

TEZĂUR LITURGIC

4 IULIE

ACATISTUL SF. ÎMPĂRAT-MUCENIC NICOLAE II ROMANOV AL RUSIEI VII



MOSCOVA, 2000



Акафист

Святому великомученику благочестивому Царю Николаю II

Кондак 1

Взбранный воеводо рода русскаго, яко
покаявшеся во злых, благодарственная
восписуем ти раби твои, царю Николае. Но яко
имея скипетр и державу неодолимья, а може ты
сам приведи, да зовем ти:

Радуйся, Царю Николае, Христом Богом
царствующий.

Икос 1

Ангел предстатель с небесе послан бысть в час
отречения от тебе народа русскаго, отверзая, их
же ухо не слыша, око не виде, и не леть словесы
человеческими глаголати, мы же о гресе отцев
сокрушающесе, зовем ти:

Радуйся, имже Святая Русь возсияет;

Радуйся, имже Господь Россию прощает.

Радуйся, падшаго народа воззвание;

Радуйся, отечества нашего избавление.

Радуйся, чистото, неудобопятнаемая
человеческими домысли;

Радуйся, смирение, удивляющее ангельския
воинства.

Радуйся, яко Христа носивый в сердце своем;

Радуйся, яко Церковь Его ограждавый.
Радуйся, звездо, страдания Христовы
уяснившая;
Радуйся, крест Господень своим страданием
украшенный.
Радуйся, нас ко Господу приводяй;
Радуйся, имже отечества земнаго и Небеснаго
сподобляемся.
Радуйся, царю Николае, Христом Богом
царствующий.

Кондак 2

Видяще враги Христовы твою чистоту,
клеветами и доныне тщатся житие твое
помрачити. Ты же еще отрок сый, диаконски
возглашал еси: "О благочестивейшем и
самодержавнейшем". Мы же, слышаще из
вечности сей глас твой, поем с тобою: Аллилуиа.

Икос 2

Разум недоразумеваемый в твоём житии ищуще,
удивляемся, како имя жених матери и
любимейшаго брата отца восприял еси, прежде
жития тайныя лепоты Царствия Небеснаго в
житии твоём восписуя, темже и поем ти:
Радуйся, имя усопшаго, любимаго отцем и
материю восприявый;
Радуйся, тайну смерти и паки рождения в сем
соединивый.

Радуйся, купно с державным праотцем во зраце молниене Богом посещенный;

Радуйся, страхом Божиим ничесоже, кроме греха, бояться наученный.

Радуйся, страсотерпчества Царя-освободителя бывый свидетель;

Радуйся, терпение в страданиях восприявый как добродетель.

Радуйся, мученической кончине своего деда сострадавый;

Радуйся, царскую диадиму мученическим венцем уяснивый.

Радуйся, блаженною Ксениею со всею семьею в Борках спасенный;

Радуйся, ангела земли, идеже Борки, прославивый.

Радуйся, солдатскую службу от юности возлюбивый;

Радуйся, воином Христовым до гроба бывый.

Радуйся, царю Николае, Христом Богом царствующий.

Кондак 3

Сила Вышняго осени тогда отечество наше: от рождия Христова - Руси Святой, грозд ханаанский показа - благочестивейшаго из русских царей. Мы же молитвами его чающе пити новое вино во Царствии Божием вопием сице: Аллилуиа.

Икос 3

Имея Богоприятную землю душу твою, праотцы
и отцы твоими от Владимира Святого
тысящелетне удобренную, плод сторичен
Господу купно со царицею и чады принесл еси.
Мы же малое моление сие прилагающе к
небесной славе твоей дерзаем тако пети тебе:
Радуйся, ромеев наследниче;
Радуйся, рода Романовых венче.
Радуйся, Христа в сердца наша возвращаяй;
Радуйся, тебе молящихся посещаяй.
Радуйся, отче народа русскаго;
Радуйся, его же токмо Сын Божий открывает.
Радуйся, яко в тебе сокрыто изобилие жизни
вечныя и временныя;
Радуйся, готовое наше покаяние.
Радуйся, молитвенниче теплый за землю
Русскую;
Радуйся, Сергие и Димитрие по чину
Мелхиседекову.
Радуйся, возвращаяй сердца отцев детям;
Радуйся, каменная сердца наша пременяяй на
плотьяная.
Радуйся, царю Николае, Христом Богом
царствующий.

Кондак 4

Бурю внутрь имея помышлений сумнительных
целомудренный цесаревич из воли Божия и

родительския отнюд не дерзал есть. Темже, церковных венцев долготерпением, верою и любовью достигнув, благодарно Богу вопиял есть: Аллилуиа.

Икос 4

Слышаша Пастыря пастырей в Ветсем и Новем Заветех глаголюща: яже Бог сочетал есть, человецы не разлучат никогдаже. Темже все упование на Него возложил еси. Мы же нетерпеливии и маловернии со страхом взываем ти:

Радуйся, сердце твое, иже в руцех Божиих, единожды возлюбившее никогдаже пременивый;

Радуйся, яко десятилетнее пождание твое Господь святою супругою увенчал есть.

Радуйся, из послушания воле отчей никогдаже выходивый;

Радуйся, волю Отца Небеснаго всегда ясно разумеый.

Радуйся, именем провозвестницы Евангелия прощения первенцу твою нарекий;

Радуйся, яко сия не мстити за убиение твое нам заповедала есть.

Радуйся, именем диакониссы римския дщерь твою вторую назваый;

Радуйся, яко сия истинная служительница в церкви своей малой явилася есть.

Радуйся, яко третия дщи твоя благую часть избра, яже и не отнимется от нея;

Радуйся, яко сия язвы на ногу Иисусову врачевала есть.

Радуйся, яко юнейшая дщи твоя воскресением называется;

Радуйся, яко четырьмя мудрыми девами мы от сластей мiра воскресаем.

Радуйся, царю Николае, Христом Богом царствующий.

Кондак 5

Боготечную звезду жития твоего зрим на смеркающихся летописех российских и вселенских: житием твоим, светом и твердостью адаманту подобным, испытуются последующии владыки, мы же, токмо мимо шествовати слыша славу твою, слепцем подобно вопием о тебе Богу: Аллилуиа.

Икос 5

Видеша иноплеменнии и инославнии святость жития твоего и святыя семьи твоея, удивляхуся народу русскому, таковаго сокровища не ценившему, тщашася сии своими талантами служити тебе, мы же, соотечественницы твои суще, согрешили на Небо и пред тобою, и уже не достойни нарещися сыны твои, но токмо вопием ти:

Радуйся, радуга многоцветная заповедей Христовых;
Радуйся, имже от потопа беззаконий моих избавляюся.
Радуйся, пастырю добрый народа русскаго;
Радуйся, душу свою за Христа, им распятаго, положивый.
Радуйся, врагов твоих и поныне нестерпимое жжение;
Радуйся, врат адовых вечное разрушение.
Радуйся, славо России незаходимая;
Радуйся, страстотерпцев надежный образе.
Радуйся, столпе веры Православныя;
Радуйся, твердое Церкви ограждение.
Радуйся, яко ты еси знамение пререкаемое;
Радуйся, яко тобою открываются помышления многих сердец.
Радуйся, царю Николае, Христом Богом царствующий.

Кондак 6

Проповедник Богоносный бывый, многия страны вселенныя посетил еси, проповедав Христа всем самым явлением твоим. Темже и древний враг не терпя сего во главу попущением Божиим уранил тя. Мы же радуящиеся спасению главы российския вопием Богу: Аллилуиа.

Икос 6

Возсиявый на крайнем востоце просвещение истины, отгнал еси лжи тьму, нечестивии же, не терпяще сего, на жизнь твою покусишася. Князь же греческия страны отнюдуже вера

Православная нам возсия спасе жизнь твою, еще страданий не исполнившуюся, темже и мы поем ти:

Радуйся, уранением во главу об опасности державе твоей предвозвещенный;

Радуйся, князем отечества Православия от сего спасенный.

Радуйся, смирения Христова поборниче;

Радуйся, уничижения царства твоего отнюд не терпевый.

Радуйся, блаженне миротворче евангельский;

Радуйся, удар отечеству твоему нанесенный твердо приявый.

Радуйся, в бедах бранных о милостех Божиих покаянно просивый;

Радуйся, милость Божию в рождении наследника приявый.

Радуйся, истощание крови царския сквозь все житие видевый;

Радуйся, авраамски сына своего жертвою за грех народа узнавый.

Радуйся, в измене лукаваго раба древнюю сеть уведевый;

Радуйся, единород пребывый ради Христа.
Радуйся, царю Николае, Христом Богом
царствующий.

Кондак 7

Хотяще воину некоему бородинскому от
нынешняго века преставитися прелестнаго не
благослови Христос Бог дондеже не узрит Новаго
Чудотворца Николая, милость суд и веру
исполняющаго, дондеже не воспети ему о царе
Богу: Аллилуиа.

Икос 7

Новую показа Русь Святую, онебесившуюся уже,
яко несть на земли Русской покаяния. В ту же
новую землю ни един русский без царя
страстотерпца не внидет дондеже не запоет:
Радуйся, яко прикладом ударяемый токмо "за
что, голубчик?" вопросивый;
Радуйся, темже твое есть Царство Небесное.
Радуйся, яко кровавыми слезами "измена,
трусость и обман" написал еси;
Радуйся, яко на лоне Авраамове утешился еси.
Радуйся, яко кротце всех простил еси;
Радуйся, на веки землю Русскую наследовал еси.
Радуйся, яко страждущих тайно вином и елеем
умащал еси;
Радуйся, яко Господь помиловал есть в тебе
царство твое.

Радуйся, за охранение чистоты ближними
возненавиденный;

Радуйся, яко зрением Бога выну истее
причащаешься.

Радуйся, яко доньне поносят, иждевают, рекут
всяк зол глагол лжуще на тебя ради Христа;

Радуйся, яко мзда твоя вечное Царствие
Небесное.

Радуйся, царю Николае, Христом Богом
царствующий.

Кондак 8

Станное житие сына твоего видевшие,
устранимся мира, ум на небеса преложше: како
прежня и будущия судьбы отечества нашего
житием сим изобразишася, мы же взор, яко
орлиный, обретше, вопием: Аллилуиа.

Икос 8

Весь бе в нижних, но и Руси Святыя заветов не
отступи никакоже, святыи страстотерпче царю
Николае: ведяше, яко царство Русское крепко
бысть Царствием Небесным, идеже не помогает
ни богатство, ни крепость телесная, ни разум
плотский, ни подвиги праотцев, но токмо
любовь ко Господу, темже и Русь Святая тебе
возглашает:

Радуйся, яко двух архиереев малоросских паки
соединивый;

Радуйся, яко в любви их царство твое совершивый.

Радуйся, саровскаго столпника на раменах носивый;

Радуйся, славой крестною по молитвам его венчаный.

Радуйся, благоверных Анну и Евфросинию вознесый;

Радуйся, яко их молитвами Небеснаго Иерусалима неразлучно со чады достигнувый.

Радуйся, патриарха, Россию спасшаго, возвеличивый;

Радуйся, патриаршеством Россию спасти возжделевый.

Радуйся, Питирима Тамбовскаго обретый;

Радуйся, якоже и сей, бездомным храмоздателем явивыйся.

Радуйся, яко храмы тмочисленныя поставивый;

Радуйся, души безчисленныя ко Христу приведый.

Радуйся, царю Николае, Христом Богом царствующий.

Кондак 9

Всякое естество ангельское и человеческое удивися великому твоего самоумаления делу: как во всем житии твоём воле Божии послушлив был еси даже до смерти, никакоже свою волю творя, но взирая на крест Господень. С сими же

силами небесными и верными человеки и мы
вопием: Аллилуиа.

Икос 9

Ветия многовещанная, яко рыбы безгласная,
видим о тебе, царю мучениче, яко сии, на
лжеименный разум полагающесе, дерзают
безбожными усты судити тя, в волю Божию
предавшагося. Ты же в молчании проходиши
многоскорбное твое житие, яко же Господь во
дворе первосвященничестве, мы же взор твой
сретающе, вопием ти:

Радуйся, яко новыя страны народом русским
населил еси;

Радуйся, яко сей народ твой злаго врага победил
есть.

Радуйся, яко в совете и любви с твоим народом
жити желавый;

Радуйся, яко народ свой для совета и любви
призывавый.

Радуйся, аще и в совете сем врата адовы
обретый;

Радуйся, яко твоя любовь к народу сии не
одолеша.

Радуйся, яко от наемных пастырей Церковь
Русскую сохранивый;

Радуйся, яко тайныя помышления их
проницавый.

Радуйся, аще и в патриаршестве твоём князьми

Церкве отвергнутый;

Радуйся, яко не надеялся еси на князи, на сыны человеческия.

Радуйся, аще и князи сии удалишася на страну далече;

Радуйся, яко первых простил еси их, первыми тебе прославивших.

Радуйся, царю Николае, Христом Богом царствующий.

Кондак 10

Спасти хотя отечество твое от распри междоусобныя, вдался еси, яко овча безгласное в руже известных врагов твоих, поношения, оскорбления и унижения от народа твоего терпя, нас непокорливых научая смирению да воспоем Богу: Аллилуиа.

Икос 10

Стена еси всем сыновом российским во обстояниих последняго времени, царю Николае, избавляя от нежданно находящих на ны по грехам нашим: защищая от вздымающихся волн моря житейскаго. Тобою бо твердость обретаем, темже и поем ти:

Радуйся, стено неборимая Церкви Христовой;

Радуйся, міра всего зло удерживаяй.

Радуйся, яко вопиеша со Михаилом

Архистратигом: "станем со страхом";

Радуйся, видит бо Господь сие стояние яко добро.

Радуйся, яко ты обновляеши кающийся народ-детоубийцу;

Радуйся, яко ты молишия за нерожденных чад русских.

Радуйся, растлителей России наказуяй;

Радуйся, чистоту детскую охраняяй.

Радуйся, Россию паки Господу уневестивый;

Радуйся, наше непреложное будущее устрояяй.

Радуйся, православные браки созидаяй;

Радуйся, блудных чад отцем возвращаяй.

Радуйся, царю Николае, Христом Богом царствующий.

Кондак 11

Пение всякое побеждается приникающе к страстем Господним, тем же и мы, созерцающе хриstopодражательныя страдания твоя, затворяем недостойныя уста наша, тишина же ангельски гремит: Аллилуиа.

Икос 11

Светоприемную свещу сущему во тьме и сени смертней народу зрим тя, царственный страдальче: тихо, яко свеча, и прямо, и горе устремленно житие твое, и горяча, яко огонь, любовь твоя к народу твоему, тем же и наша сердца возжизает пети тебе сице:

Радуйся, душу за сербския други своя
положивый;
Радуйся, яко взял еси крест войны всемирныя и
себе отверглся еси.
Радуйся, аще и ближними воеводами
преданный;
Радуйся, их же лобзанием простил еси.
Радуйся, с народа грех клятвопреступления
вземый;
Радуйся, чашу горькую в народа место испивый.
Радуйся, яко Господу во смирении уподобился
еси;
Радуйся, яко малую церковь твою на заколение
привел еси.
Радуйся, яко жертвою всесожжения сына твоего
принесл еси;
Радуйся, яко горлицами за грех народа дщери
твои принеслися суть.
Радуйся, егоже Бог с народом сочета и человецы
не разлучиша;
Радуйся, яко Пасха русская явился еси.
Радуйся, царю Николае, Христом Богом
царствующий.

Кондак 12

Благодать дати восхотев людем своим, егда за
грехи тяжкия и общее отступление во многих
изсяче любви, посла нам ангела хранителя земли
Русския Новаго Николая Чудотворца. Он же

рукописание грехов наших раздирая, присно Богу поет: Аллилуиа.

Икос 12

Поюще твое долготерпение, хвалим тя вси, лестнице покаяния народа нашего: степени схождения твоего в подвал дома Ипатиева, степени восхождения от тьмы греховныя народу твоему явились суть. Тем же и бездна чудес тобою нам подается, научая пети всех:

Радуйся, яко святитель Николай тебе молитися призывает;

Радуйся, по смерти Победоносцем явивыйся.

Радуйся, Давиду кротостию, и Соломону мудростию уподобивыйся;

Радуйся, из тьмы кромешныя и топи изводящий.

Радуйся, бесплодной матери райский плод подай;

Радуйся, яко послушливому иерею со дна источника крест подал еси.

Радуйся, из темницы изводяй;

Радуйся, всякое прошение исполняяй.

Радуйся, всякую болезнь врачуй;

Радуйся, в пути сшествуй.

Радуйся, гонителей твоих, алчущих и жаждущих правды, превращаяй;

Радуйся, помощниче прежде прошения нашего.

Радуйся, царю Николае, Христом Богом царствующий.

Кондак 13

О, великий Боговенчаный страсотерпче царственный мучениче Николае! Чрез все житие твое страдальчествовати изволил еси, блудным сыновом российским имение разделяя. Наконец же свою и чад своих кровь источил еси, Христу подобяся, да обратимся, и приидем в себе, и воспоем о тебе Богу: Аллилуиа.

Сей кондак глаголи трижды. И паки чтется 1-й икос и 1-й кондак.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**